

Rapport dalla sessiun dil cussegl da vischnaunca dils 28-07-2015

Tractanda 1

Approbaziun dil protocol dalla sessiun dils 15-06-2015

Il protocol dalla sessiun dils 15-06-2015 vegn approbaus en votaziun unanima cun engraziament.

Tractanda 2

Orientaziun davart il stan dallas lavurs vid il campadi

Il vicepresidente dalla societad acziunara Campadi Trun SA, Donat Nay, informescha il cussegl da vischnaunca davart igl andament dil project pil niev campadi.

Enteifer in'emprema etappa vegnan il baghetg da menaschi principal, il baghetg sanitar, tschun bungalows ed il parcadi realisai. L'emprema badalada ha liug ils 21 d'ust 2015. Il baghetg principal ruch duei esser construius tochen igl unviern. La primavera 2016 vegn il baghetg vegl spazzaus ed ei vegn entschiet cun la construcziun dil baghetg secundar. La finamira ei, ch'il niev menaschi sa entscheiver naven dalla sesiun da campadi 2016.

Tractanda 3

Lescha davart il provediment d'aua

Suenter l'elaboraziun dalla lescha davart igl allontanament e la purificaziun dallas auas ha la cumissiun predeliberonta per la revisiun dil regulativ da taxas per serenera, canalisaziun ed aquaducts giu l'incarica d'elaborar en in secund pass la lescha ed in regulativ da taxas per il provediment d'aua.

La lescha davart il provediment d'aua daventa la basa legala per las corporaziuns d'aua da Trun. Era tier il provediment d'aua vegn pretendiu dil dretg surordinau da quintar giu taxas suenter principi da caschunader. Sco previu proponanan la cumissiun predeliberonta e la suprastanza communal il medem model da quintar giu taxas sco tier la dismessa d'aua, pia ina taxa fundamentala annuala sur il schazetg ed ina taxa annuala da consum tenor diever d'aua che va sul dumbrader.

Actualmein vegn la cumissiun presidiada da gerau Toni Pfister e secumpona dils commembers Lucas Arpagaus, Mattias Cadruvi, Lotar Tomaschett e Benedetg Simeon. La cumissiun consista pia ord ils presidents ed ulteriurs commembers dallas corporaziuns d'aua, quei ch'ei stau in grond avantatg per l'elaboraziun dalla lescha davart il provediment d'aua.

Gerau Toni Pfister presenta la lescha en tut detagl. Ils commembers dil cussegl fan diever dalla pusseivladad da tschentiar damondas.

Cun 11 : 0 vuschs approbescha il cussegl da vischnaunca la lescha davart il provediment d'aua inclus il regulativ da taxas per mauns dalla votaziun all'urna.

Tractanda 4

Approbaziun dils statuts dalla Regiun Surselva

Il pievel grischun ha approbau ils 30 da november 2014 la legislaziun adesiva davart la refuorma territoriala. Aschia remplazzan las endisch novas regiuns naven digl onn 2016 ils cumins, las corporaziuns regionalas ed ils districts. Las 18 vischnauncas dalla Surselva fuorman da niev la regiun Surselva. Las vischnauncas da Flem e Trin appartegnan da niev alla regiun Plaun. La nova regiun Surselva dispona da 21'347 habitonts (diember da habitonts per la fin 2013). Sedia dalla regiun Surselva ei Glion.

Il president communal Dumeni Tomaschett presenta ils statuts e dat la pusseivladad da tschentar damondas.

Cun 10 : 0 vuschs ed ina abstenziun approbescha il cussegl da vischnaunca ils novs statuts dalla Regiun Surselva per mauns dalla votaziun all'urna.

Tractanda 5 Pusseivladad da tschentar damondas

Dalla pusseivladad da tschentar damondas vegn fatg diever.

Per il cussegl da vischnaunca

Il president
Flurin Decurtins

L'actuara
Sandra Gautschi